



Fasnacht 2017

Mir hänn dr Lengsch....

Wie sich s duet gheere, mir hänn die greeschti Reere

Schliesslig sellsch nid näh dr Kaare
Sondern mit em Ziigli in Süde fahre
Zem schnäller sii hänn sich d Bolitigger yberleggt
Mues e Dunnel aane, hänn sie cheggt
Sauschnäll, wär hätt das dännggt
Hänn mer uns duur e Felse gsprängt

Lang hänn mer zerscht miesse bange
Doch jetzt hänn mer en Dunnel, en lange
Dr Ogi, dr Stich und au dr Laiebärger
Hänn gwaiblet, es hat au geh viel Ärger
Au d Leuthard het no miesse wytermache
Aber sie hets denn kenne lo krache

Au im Schwoobeland dien sie's heere
Mir hänn die greeschti Reere
D Schwoobe stuune und glotze
Wie mir e Dunnel aane klotze
Z Berlin versueche sie e Flugplatz z baue
Dopplet so lang, däne kasch nid traue

Au dr Ami het e Knall
Baut gäg Mexiko „the Wall“
Leecher muesch mache, das isch nit „gähn“
Switzerland isch scho immer great, nid agän
D Ösis und d Franzose dien ys derfiir loobe
Hey joo, mir transportiere jetzt d Schwoobe

Die und d Italos dien no mee schlampe
Baue nid die Zuefaahrtsrampe
Dr Bundesroot hets Broblem begirffe
Und duet sofort zem Delifon griffe
Hampe Wessels nimm e Kische in d Finger!
Denn goht die Sach scho viel ringer

In unsrem Dunnel faahre d Ziigli fliessig
Hey joo, hesch jo nid nur Tempo Drissig
Freue duet sich au d Ess Bee Bee
Gsehsch kai Wäägeli mit Kaffi mee
Numme d Bündner dien griina
Es git kai Porta Alpina

Nur d Ereffnig git z diskutiere
D SVP meint, mir dien ys blamiere
D Tänzer hängge an de Kraane
Löchere dr Leuthard ihre Faahne
Me froogt sich isch das Kultur?
Oder sinds Gaischter us dr Natur?

Ob Lecher oder Muure
Mir dient nyt beduure
Mir dien is nid blamiere
Sondern drey Dääg intrigiere
Du kasch es eraane
Mir spränge nid nur dr Raame